



PATNUBAY SA MISA

24 Agosto 2025

Ika-21 Linggo sa Karaniwang Panahon

Taon K

ANG HAMON NG MAKIPOT NA PINTUAN

Sa makabagong sikolohiya, pinahahalagahan nang gayon na lamang ang “mabuting pakiramdam” at “pagmamahal sa sarili” bilang kundisyon para sa pagmamahal sa kapwa. Ngunit sa Ebanghelyo ngayon, pinaaalalahanan tayo ni Hesus na walang madaling daan para maging alagad niya nang ipahayag niyang ang Kaharian ng Diyos ay mararating sa pamamagitan lamang ng “makipot na pintuan.”

Tiyak na ang tinutukoy ni Hesus ay di ang karaniwang pintuang makipot, kundi ang “makipot na pintuan” ng katapatan sa ating mga tungkulin araw-araw at pagsunod sa kautusan ng Diyos sa ating buhay.

Sa Eukaristiya natin ngayon, idalangin nating biyayaan tayo ng tibay ng kalooban para piliin natin ang “makipot na pintuan” ng pagsasakripisyo sa halip ng maluwang na pintuan ng karangyaan at iba pang anyo ng pansariling kasiyahan.



PASIMULA



Pambungad

(Ipahayag lamang kung walang awiting nakahanda.)

Sa aking abang dalangin,
D'yos ko, ako'y iyong dinggin.
Ang pagsamo ko't pagdaing
ay mangyaring iyong dinggin.
Kaligtasa'y aking hiling!
(*Sal 86:1-3*)

Pagbati

P– Ang biyaya ng ating Panginoong Hesukristo, ang pag-ibig ng Diyos Ama, at ang pakikipagkaisa ng Espiritu Santo nawa'y sumainyong lahat.

B– At sumaiyo rin.

Pagsisisi

P– Mga kapatid, aminin natin ang ating mga kasalanan upang maging karapat-dapat sa pagdiriwang ng mga banal na misteryo. (*Manahimik sandali.*)

P– Sinugong tagapagpagaling sa mga nagsisisi. Panginoon, kaawaan mo kami.

B– Panginoon, kaawaan mo kami.

P– Dumating na tagapag-anya-yang mga makasalana'y magsisi. Kristo, kaawaan mo kami.

B– Kristo, kaawaan mo kami.

P– Nakaluklok ka sa kanan ng Diyos Ama para ipamagitan kami, Panginoon, kaawaan mo kami.

B– Panginoon, kaawaan mo kami.

P– Kaawaan tayo ng makapangyarihang Diyos, patawarin tayo sa ating mga kasalanan, at patnubayan tayo sa buhay na walang hanggan.

B– Amen.

Papuri

B– Papuri sa Diyos sa kaitaasan at sa lupa'y kapayapaan sa mga taong kinalulugdan niya. Pinupuri ka namin, dinarangal ka namin, sinasamba ka namin, ipinagbu-

bunyi ka namin, pinasasalamatan ka namin dahil sa dakila mong angking kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

Panalangin Pambungad

P– Ama naming makapangyarihan, ginagawa mong kami'y magkaisa ng kalooban. Ipagkaloob mong ang iyong mga utos ay aming mahalin, ang iyong mga

pangako ay hangarin naming tanggapin, upang sa ano mang pagbabago sa paligid namin, manatiling matatag ang aming loobin sa tunay na kasiyahang matatagpuan sa iyong piling sa pamamagitan ni Hesukristo kasama ng Espiritu Santo magpasawalang hanggan. **B– Amen.**

PAGPAPAHAYAG NG SALITA NG DIYOS



Unang Pagbasa *Isa 66:18-21*
Sa pamamagitan ng propetang si Isaias, pinaaalalahanan tayo ng Panginoong ang Kanyang plano ay sumasaklaw sa lahat ng tao at lahat ng kultura. Tayo man ay bahagi ng gayong magandang plano ng dakilang pag-ibig ng Diyos para sa lahat.

L–Pagbasa mula sa Aklat ni Propeta Isaias

Ito ang sinasabi ng Panginoon: “Nalalaman ko ang iniisip nila at mga ginagawa. Darating ako upang tipunin ang lahat ng bansa, at mga taong iba’t iba ang wika. Malalaman nila kung gaano ako kadakila. Malalaman din nilang ako ang nagpaparusa sa kanila. Ngunit magtitira ako ng ilan upang ipadala sa iba’t ibang bansa.

Susuguin ko sila sa Tarsis, sa Pul at sa Lydia, mga dakong sanay sa paggamit ng pana. Magsusugo rin ako sa Tubal at Javan, at sa mga baybaying hindi pa ako nababalita sa aking kabantugan. Ipahahayag nila sa lahat ng bansa kung gaano ako kadakila. Bilang hangog sa akin sa banal na bundok sa Jerusalem, ibabalik nila ang mga kababayan ninyo buhat sa pinagtapunan sa kanila. Sila’y darating na sakay ng mga kabayo, asno, kamelyo, karwahe at kariton, tulad ng pagdadala ng mga handog na butil sa Templo, nakalagay sa malilinis na sisidlan.

Ang ilan sa kanila ay gagawin kong saserdote at ang ilan ay Levita.”

Ang Salita ng Diyos.
B– Salamat sa Diyos.

Salmong Tugunan

Salmo 116:1.2
B–Humayo’t dalhin sa tanan, Mabuting Balitang aral!

R. M. Velez



* **Purihin ang Poon! Dapat na purihin ng lahat ng bansa. Siya ay purihin ng lahat ng tao sa balat ng lupa.** **B.**

* **Pagkat ang pag-ibig na ukol sa ati’y dakila at wagas, at ang katapatan niya’y walang wakas.** **B.**

Ikalawang Pagbasa

Heb 12:5-7.11-13

Ipinaaalaala sa atin ng may-akda ng Liham sa mga Hebreo na ang mga kahirapa’t pagdurusa natin sa buhay ay mga paraan ng pagdisiplina ng Diyos sa ating Kanyang mga anak, para sa ating kabutihan.

L–Pagbasa mula sa Sulat sa mga Hebreo

Mga kapatid: Nalimutan na ba ninyo ang pangaral ng Diyos sa inyo bilang mga anak niya – mga salitang nagpapalakas ng loob ninyo? “Anak, huwag kang magwalang-bahala kapag itinutuwid ka ng Panginoon, at huwag panghinaan ng loob kapag ikaw ay pinarurusahan niya. Sapagkat pinarurusahan ng Panginoon ang mga iniibig niya, at pinapalo ang itinuturing niyang anak.”

Tiisin ninyo ang lahat bilang pagtutuwid ng isang ama, sapagkat ito’y nagpapakilalang kayo’y inaari ng Diyos na kanyang mga anak. Sinong anak ang hindi itinutuwid ng kanyang ama?

Habang tayo’y itinutuwid, hindi tayo natutuwa kundi naghihinagpis. Ngunit pagkaraan niyon, lalasap tayo ng kapayapaang bunga ng matuwid na pamumuhay. Kaya’t palakasin ninyo ang inyong lupaypay na katawan at tipunin ang nalalabi pang lakas! Lumakad kayo sa

daang matuwid upang hindi tuluyang mapilay, kundi gumaling ang paang nalinsad.

Ang Salita ng Diyos.
B– Salamat sa Diyos.

Aleluya

Jn 14:6

B– Aleluya! Aleluya!

Ikaw, O Kristo, ang Daan, ang Katotohana’t Buhay patungo sa Amang mahal. Aleluya! Aleluya!

Mabuting Balita *Lu 13:22-30*

Bukas sa lahat ang pagkakataong mapabilang sa Kaharian ng langit, ngunit sa kundisyong mamuhay alinsunod sa turo ni Hesus. Iyon ang “makipot na pintuan” tungo sa buhay na walang hanggan.

P– Sumainyo ang Panginoon.

B– At sumaiyo rin.

P– Ang Mabuting Balita ng Panginoon ayon kay San Lucas
B– Papuri sa iyo, Panginoon.

Noong panahong iyon, nagpatuloy si Hesus sa kanyang paglalakbay. Siya’y nagtuturo sa bawat bayan at nasyon na kanyang dinaraan patungong Jerusalem.

May isang nagtanong sa kanya: “Ginoo, kakaunti po ba ang maliligtas?” Sinabi niya, “Pagsikapan ninyong pumasok sa makipot na pintuan. Sinasabi ko sa inyo, marami ang magpipilit na pumasok ngunit hindi makapapasok. Kapag ang pinto’y isinara na ng puno ng sambahayan, magtititi kayong nakatayo sa labas, at katok nang katok. Sasabihin ninyo, ‘Panginoon, papasukin po ninyo kami.’ Sasagutin niya kayo, ‘Hindi ko alam kung tagasaan kayo!’ At sasabihin ninyo, ‘Kumain po kami at uminom na kasalo ninyo, at nagturo pa kayo sa mga lansangan namin.’ Sasabihin naman ng Panginoon, ‘Hindi ko alam kung tagasaan kayo! Lumayo kayo sa akin, kayong lahat na nagsisigawa ng masama!’ Tatangis kayo at magngangalit ang inyong ngipin kapag nakita ninyong nasa kaharian ng Diyos sina Abraham, Isaac at Jacob, at ang lahat ng propeta, at kayo nama’y ipinagtabuyan sa labas!

At darating ang mga tao buhat sa silangan at kanluran, sa hilaga at timog, at dudulog sa hapag sa kaharian ng Diyos. Tunay ngang may nahuhuling mauuna, at may nauunang mahuhuli.”

Ang Mabuting Balita ng Panginoon.

B–Pinupuri ka namin, Panginoong Hesukristo.

Homiliya

Sumasampalataya

B– Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkawatang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

Panalangin ng Bayan

P– Batid ang kahirapan habang dumaraan tayo sa “makipot na pintuan” ng tunay na buhay Kristiyano, idalangin natin ang maawaing tulong ng Panginoon:

B–Panginoon, gabayan Mo kami!

* Para sa Simbahan, ang pamilyanan ng mga sumasampalataya: Nawa’y tanggapin niya ang lahat ng kultura at tradisyon upang dalisayin at palaguin niya ang mga pagpapahalaga ng Mabuting Balita. Manalangin tayo. **B.**

* Para sa Santo Papa at lahat ng Obispo: Nawa sila’y laging maging malinaw na tanda at

kasangkapan ng pag-ibig ng Diyos sa lahat ng tao, sa kanilang pangangaral at sa kanilang mga gawaing pastoral. Manalangin tayo. **B.**

* Para sa dumaranas ng kahirapan sa pamumuhay alinsunod sa Mabuting Balita: Nawa’y magtamo sila ng ginhawa sa alaalang may gantimpala ang Diyos para sa bawat isa alinsunod sa kanilang pagsisikap. Manalangin tayo. **B.**

* Para sa ating parokya: Nawa ito’y maging isang tunay na “Pamayanan ng mga Alagad” kung saan bawat kasapi ay nakadarama ng pagpapahalaga at tulong sa patuloy na pagsisikap mamuhay alinsunod sa turo ng Panginoon. Manalangin tayo. **B.**

P– Diyos Ama, maraming salamat at ginawa Mo kaming Iyong mga anak kay Hesus, na aming Kapatid at Tagapagligtas. Tulungan Mo kami sa aming pagsisikap na lalong mapalapit sa Iyo sa pamamagitan ng “makipot na pintuan” ng tapat na pagsunod sa Iyong kalooban. Isinasamo namin ito sa ngalan ni Kristong aming Panginoon.

B– Amen!



P– Manalangin kayo . . .

B– Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P– Ama naming Lumikha, pinagkamit mo kami ng iyong pagkukop pakundangan sa isang pampalagiang paghahandog kaya’t sa iyong Sambayanan ay iyong ipagkaloob ang pagkakaisa at kapayapaang nagbubuklod bunga ng aming mga alay na iyong ikinalulugod sa pamamagitan ni Hesukristo kasama ng Espiritu Santo magpasawalang hanggan. **B– Amen.**

Prepasyo VI

P– Sumainyo ang Panginoon.

B–At sumaiyo rin.

P– Itaas sa Diyos ang inyong puso at diwa.

B– Itinaas na namin sa Panginoon.

P– Pasalamat natin ang Panginoong ating Diyos.

B–Marapat na siya ay pasalamat.

P– Ama naming makapangyarihan, tunay ngang marapat na ikaw ay aming pasalamat.

Nasa iyo ang aming buhay, pagkilos at pag-iral. Sa pamumuhay namin araw-araw tinatamasa namin ang iyong pagmamahal. Sa pag-ibig mong ipinunla sa sangkatauhan ang Espiritu Santo’y unang aning bigay ng Anak mong naglagak sa amin ng katiyakang nakalaang mabuhay kami sa piling mo kailanman.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami’y nagbubunyi sa iyong kadakilaan:

B– Santo, santo, santo Panginoong Diyos ng mga hukbo. Napupuno ang langit at lupa ng kadakilaan mo. Osana sa kaitaasan.

Pinagpala ang naparirito sa ngalan ng Panginoon. Osana sa kaitaasan.

Pagbubunyi

B– Si Kristo ay gunitaing sarili ay inihain bilang pagkai’t inuming pinagsasaluhan natin hanggang sa siya’y dumating.



B– Ama namin . . .

P– Hinihiling namin . . .

B– Sapagkat iyo ang kaharian at ang kapangyarihan at ang kapurihan magpakailanman. Amen.

Paanyaya sa Kapayapaan

Paghahati-hati sa Tinapay

B– Kordero ng Diyos na nag-aalis ng mga kasalanan ng sanlibutan, maawa ka sa amin. (2x)

Kordero ng Diyos na nag-aalis ng mga kasalanan ng sanlibutan, ipagkaloob mo sa amin ang kapayapaan.

Paanyaya sa Pakikinabang

P– Ito ang Kordero ng Diyos na nag-aalis ng mga kasalanan ng sanlibutan. Mapalad ang

mga inaanyayahan sa kanyang piging.
B–Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinabang
(Ipahahayag lamang kung walang awiting nakahanda.)

Ang halaman ay namunga at may pagkaing nakuha, ubas na dulot ay sigla, pawang bigay ng D'yos Ama upang tayo'y lumigaya.

(Sal 104:15-15)

Panalangin Pagkapakinabang

P–Ama naming mapagmahal, lubusin mo sa amin ang kagalingang bigay ng iyong pag-ibig na gayo'y ipinagdiriwang at kami nawa'y magkaroon ng ganap na kaunlaran upang sa lahat ng aming pinagkakaabalahan ikaw ay aming mabigyang-kasiyahan sa pamamagitan ni Hesukristo kasama ng Espiritu Santo magpasawalang hanggan.

B–Amen!



P–Sumainyo ang Panginoon.

B–At sumaiyo rin!

P–At pagpalain nawa kayo ng makapangyarihang Diyos: Ama, Anak, at Espiritu Santo.

B–Amen!

P–Humayo kayo sa kapayapaan upang mahalin at paglingkuran ang Panginoon.

B–Salamat sa Diyos!



Sabayang Pagsasanay, Isahang Pangangaral

Kalakbay at Katoto

Sabayan at isahang pagsasayaw sa bilangguan sa Cebu at in-upload sa *You Tube*? *Only in the Philippines*, ika nga!

Ang naganap ay isang malinaw na halimbawa ng kung ano ang maidudulot ng dalawang bagay: kaisahan at sabayang pagsasanay. Ang kaisahan ay naganap dahil sa kanilang pinag-isang layunin, at pinag-isang adhikain.

Itong kaisahang ito ang isa sa mga pangunahing paksa natin sa araw na ito.

Sa pangitain ni Isaias, binabanggit ang pagdatal ng maraming tao mula sa iba-ibang sulok ng daigdig, na isinasagisag ng sari-saring wika na iisa ang sinasambit – ang luwalhati ng Diyos (Unang Pagbasa). Ito rin ang pangitaing tinutukoy ni Lucas ... *“magdaratingan ang marami mula sa silangan at kanluran, mula hilaga at timog, at makikisalo sa hapag ng kaharian ng Diyos”* (Ebanghelyo).

Kaisahan ang nais ng Diyos para sa kanyang bayan. Kaisahan ang kanyang magandang balita sa pamamagitan ni Kristong kanyang Anak. Nguni't ang naising ito ng Diyos ay may kaakibat na katungkulan. Ano ba ang pananagutang kaakibat nito?

Una sa lahat, dapat nating gunitain na ang pangarap na ito ng Diyos para sa atin ay pinagbayaran Niya nang mahal. Ito ang dinasal natin sa ating mga alay: *“Maawaing Ama, ang ganap na sakripisyo ni Hesukristo ang siyang nagpaging-isa sa amin. Pagkalooban Mo ang iyong Iglesia ng kapayapaan at kaisahan. Hinihiling namin ito sa pamamagitan ni Kristong aming Panginoon.”*

Ang kaisahan ay hindi isang alpombrang basta na lamang inilalatag. Ito ay pinagsisikapan, pinaghihirapan. Mayroon itong kaakibat na pagsasanay.

Pagsasanay . . . ito ang kaakibat na paksa ng ating mga pagbasa. Walang luwalhati kung walang pighati. Ito ang sinasaad ng pagbasa mula sa liham sa mga Hebreo: *“Huwag siphayuin ang disiplinang galing sa Panginoon, o mawalan ng pag-asa kung binibigyang-pasakit niya; sapagka't ang minamahal niya ay dinidisciplina; pinarurusahan niya ang anak na kanyang kinikilalang anak.”*

Malinaw sa karanasan ng mga preso sa Cebu na ang anumang magaling, kapag pinagsikapan ng lahat, ay lalu pang gumagaling, lalu pang gumaganda. Ang masusing pagsasanay, ang samasamang pagsisikap, ay hindi maaaring hindi magbunga nang



**WORD AND LIFE
PUBLICATIONS**

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 8894-5401; 8475-8945 • Website: www.wordandlife.org

• E-mail: wordandlifepublications@gmail.com • FB: Word And Life Publications

• Editorial Team: Fr. R. De Guzman, Fr. C. Dimaranan, Fr. D. Duya, V. David, R. Molmog, D. Dagui

• Illustrations: A. Sarmiento, B. Cleofe • Circulation: R. Saldua

sagana at kaaya-aya. Walang matayog na bundok sa isang handang magpunyagi, magsanay, at magdisiplina sa sarili. Ang sabayang sayaw na naging tanyag sa *cyberspace* ay hindi sana mararating kung hindi sila nagsanay, at nagbuwis ng malaking hirap at pagod upang maisagawa lamang ang ilang minutong kasiyahan para sa marami sa buong daigdig.

Sabayang-sikap at tiyaga ang tinutumbok ng mga pagbasa sa araw na ito. Nguni't para saan ba tayo dapat magsabayang-sikap? Para saan ba tayo dapat magkaisa at magsanay at magpunyagi? Sinagot ito ng atin mismong sagot matapos ng unang pagbasa: "*Humayo sa buong daigdig at ipahayag ang mabuting balita.*"

Sa larangan ng komersiyo at pangangalakal, ang uso ngayon ay *networking*, *collaboration*, pakikipag-ugnayan, at pagtutulungan. Walang mararating ang mga Lone Ranger, mga taong hindi marunong makipag-ugnayan sa ibang tao. Sa mundong ito na nababalot ng pagkamakasari at pagkakanya-kanya, sabayang-sikap ang lubhang kailangan nating lahat. ***Kung nagawa ito ng mga preso sa Cebu sa sabayang sayaw at indayog sa saliw ng iisang musika, kaya natin ito sa ibang antas ng ating buhay, lalu na sa larangan ng isahang pangangaral: "Humayo [tayo] sa buong daigdig at ipahayag ang Mabuting Balita."***



MANILA
INTERNATIONAL
BOOK FAIR



GET LIT



**STORIES IN EVERY
FORM**

SEPTEMBER 10-14, 2025
SMX CONVENTION CENTER MANILA, PHILIPPINES



**COME
and VISIT**
our booth and enjoy
our special discounts
and freebies!!!

**Booth
#226-
#227a**